

四庫全書

史部

欽定四庫全書

史部

欽定續通志卷五百十四至  
五百十六

侍講學士<sub>臣</sub>羅國俊覆勘

總校官原任侍講臣王燕緒

欽定四庫全書

欽定續通志卷五百十四

忠義傳

宋四

陳寅

賈子坤  
賈純孝

高稼

曹友聞  
萬

蹇昇

維之  
永叔

劉銳

趙汝昂

丁黼

王翊

蒲東卯  
趙崇啓

劉當可

邵復

羅由

趙晨

趙朋

羅若文

馮仲煜

李大全

王佐

趙廣

胡天啓

楊禮

周德榮

欽定四庫全書

欽定續通志

一

陳隆之 史李儉 何充

陳元桂

許彪孫 張桂 金文德 曹籍 胡世全  
龐彥海 李丁孫 唐奎瑞 江彥清

張順 張貴 牛富 王福 范天順

呂文信 張興宗 趙文義 武義 楊奇孫 何庚  
安惟臣 田廣澤

邊居誼 趙卯發 唐震 椿 馮驥  
何新之

司馬夢求 耿世安 李成大 潘大 潘大本

趙孟錦 苗再成 陶居仁 尹玉

陳炤 姚普 王安節 黃介 陳力

密佑

米立

李芾

子興

沈忠

顧應森  
陳德孫

尹毅

楊霆

趙良淳

徐道隆

陳寅寶謨閣待制咸之子漕司兩貢進士以父恩補職  
歷官州縣紹定初知西和州元兵入境寅普與民共守  
留家城中散資財以結忠義元兵十萬攻城東南門寅  
自執旗鼓激厲將士迎敵力戰屢退之元兵伐木為攻  
具增兵至數十萬圍州城甚急寅率民兵苦戰援兵不

至城遂陷寅顧其妻杜氏曰若速自為計杜厲聲曰安  
有生同君祿死不共王事者即登高堡飲藥自殺二子  
及婦俱死毋旁寅斂而焚之乃朝服登戰樓望闕焚香  
號泣再拜伏劔而死賓客同死者二十有八人一子後  
至將自裁軍士抱持之與俱縋城亦折足死事聞詔贈  
朝議大夫右文殿修撰久之加贈華文閣待制諡襄節  
賈子坤字伯厚潼川懷安軍人嘉定十三年進士為西  
和推官攝通判與寅誓死守城城陷子坤朝服與其家

十二口死之追贈承議郎官其子仲武宣教郎仲武子  
純孝登咸淳七年進士第丞相文天祥辟佐其幕尋授  
秘書丞擢吏部郎中轉朝散郎厓山師敗純孝抱二女  
偕妻年同陷海死

高稼字南叔邛州蒲江人嘉定七年進士制置使崔與  
之辟本司幹辦公事未幾改知縣谷縣寶慶三年蜀帥  
桂如淵辟通判沔州尋檄兼幕職元兵由東道至如淵  
憂之辟稼知洋州稼以洋居平地無一卒以守議移金

州帥司軍千人駐洋州而自任其餉給李心博為言諸朝不報及鳳州破制置司始從稼請調金州兵赴之而兵不時至漢中陷梁洋之民數十萬盡趨安康稼乃移屯黃金渡收散卒招忠義以州事付通判而自假節制軍馬督諸將繼進沔州破元兵迫大安益昌大震稼亟命趨沔自至西縣援之如淵以便宜命稼利路提刑司兼權興元府制置司檄守米倉稼移書請以興沔利三戎司分駐鳳州如淵遲疑不決逮天水同慶被屠西和



圍益急始會軍民之衆萬人援之道梗不得前而城已破矣如淵既罷李璽代之以稼久勞請改畀內郡差知榮州殿中侍御史汪剛中如淵黨也欲使稼分其罪乃謂蜀之敗實由稼遽罷之又削二官制置使趙彥呐以參議官辟之制置司近漢中稼言漢中蕩無藩籬宜經理仙人原以為緩急視師之地彥呐以委稼會召還彥呐密奏留稼以直秘閣知沔州利州提點刑獄兼參議官至則葺理創殘招集流散民皆襁負來歸元兵入西

和薄階州稼贊彥呐登原督戰進稼三官為朝議大夫  
兼關外四州兵撫司公事措置西路屯田元兵自鳳州  
入擣河池至西池谷距沔九十里吏民率逃議欲退保  
大安稼白彥呐曰今日之事有進無退彥呐曰吾志也  
已而竟行留稼守沔元兵自白水關入六股株距沔六  
十里沔無城依山為阻稼升高鼓噪盛旗鼓為疑兵彥  
呐至置口輟帳前總管和彥威以軍還沔召小將楊俊  
何璘悉以兵會又調總管王宣精兵千人益之璘軍無

紀律稼捕其縱火者三人誅之未幾元兵大至璘遣其  
衆皆潰遂失沔州先二日子斯得侍以時危任重為憂  
稼語之曰吾得死所何憾城既陷衆擁稼出戶兵騎四  
集圍之遂死焉詔進稼七官為正議大夫龍圖閣直學  
士謚曰忠後以子斯得執政累贈太師斯得自有傳

曹友聞字允叔同慶栗亭人武惠王彬十二世孫也登  
寶慶二年進士授縣竹尉改辟天水軍教授元兵至友  
聞罄家財招集忠義得健士五千人制置使李臺檄管

忠義領所部守仙人關友聞令諸軍乘高據險身冒矢石為士卒先兵退制置使檄扞七方關元兵破七方遂入沔州金牛至大安又分兵自嘉陵江木皮口突出長驅入劔門友聞與弟萬各率所部取間道戰於白水江中流兵退制置使檄駐閬州又檄知天水軍元兵入鳳州畧河池抵同慶城下友聞部分諸將各守一門命統制王漢臣等取間道出戰自提重兵尾敵後大戰有功特授承務郎權發遣天水軍元兵又自西和至階州友

聞往來督戰有功制置使趙彥呐俾節制利帥司軍馬  
任責措置邊面換武翼大夫閣門宣贊舍人差權利州  
駐劄御前諸軍都統制駐劄石門控扼七方關明年元  
兵破武休關入沔陽利路提刑高稼死之制置使進屯  
青野原被圍友聞遣萬領兵自冷水口度嘉陵江至六  
股株屢戰有功夜銜枚由間道直趨青野原友聞引精  
兵亦趨至原下夜半截戰圍遂得解特授武德大夫左  
驍騎大將軍依舊利州駐劄御前諸軍統制元兵破沔

州擣大安突至陽平關友聞遣將出戰又親帥帳兵及背鬼軍突出陳前左右馳射且料敵必旋兵攻雞冠隘急遣將援之兵乃解去特授眉州防禦使依舊左驍騎大將軍利州駐劄御前諸軍統制兼沔州駐劄兼管關外四州安撫權知沔州節制本府屯戍軍馬弟萬差知同慶府四州制置司帳前總管仍舊總管忠義軍馬節制屯戍軍馬董仙駐劄專與沔利兩司同共任責措置邊面明年友聞引兵扼仙人關元兵合諸軍五十餘萬

大至先攻武休關敗都統李顯忠軍遂入興元欲衝大安制置使趙彥呐檄友聞控制大安以保蜀口友聞馳書彥呐曰沔陽蜀之險要吾重兵在此敵有後顧之憂必不能越沔陽而入蜀大安地勢平曠無險可守正敵騎所長步兵所短況衆寡不敵豈可於平地控禦彥呐不從一日持小紅牌來速者七友聞議為以寡擊衆非乘夜出奇內外夾擊不可乃遣萬及弟友諒引兵上雞冠隘多張旗幟示敵堅守友聞選精銳萬人夜渡江密

往流溪設伏約曰敵至內以鳴鼓舉火為應外呼殺聲  
元兵果至萬出逆戰敵將巴圖爾達罕帥萬餘人往來  
搏戰矢石如兩萬身被數創令諸軍舉烽友聞分所部  
為三以禦敵親帥精兵三千人疾馳至隘下先遣保捷  
軍統領劉虎帥敢死士五百人衝前軍前軍不動元兵

伏三百騎道旁虎衆銜枚突戰

按宋元通鑑作友聞乃伏三百騎道旁而令虎

衆銜枚突戰未詳孰是

友聞入龍尾頭萬聞之五鼓出隘口與友

聞會內外兩軍皆殊死戰血流二十里黎明元兵益增



迺以鐵騎四面圍繞友聞殺所乘馬以示必死血戰愈厲與弟萬俱死軍盡沒事聞贈龍圖閣學士大中大夫諡毅節官二子承務郎塔迪功郎萬贈武翼大夫二子成忠郎

蹇彛潼川通泉人嘉定二年進士累官通判金州端平三年元兵攻蜀彛堅守被擒不屈而死其子永叔復力戰城破舉家死焉弟維之紹定五年進士利州都統王宣辟行參軍事亦迎敵力戰死特官其子

劉銳知文州嘉熙元年元兵來攻銳與通判趙汝鼎

昭忠

錄作汝鼎

率軍民七千餘人拒守兩月餘援兵不至城中無

水取汲於江敵增兵攻城一夕移江流於數里外銳度

不免集其家人盡飲以藥皆死聚其屍焚之家素有禮

法幼子同哥才六歲飲以藥猶下拜受飲左右為之感

泣汝鼎宣城人善射城破猶提雙刃入陣中十六矢被

執先斷其兩臂而後嚮殺之銳及其二子登文王臺自

刎死

按劉銳趙汝鼎宋史既立合傳又附載二人事於王翊等傳內前後重出今節取併載於此

丁黼成都制置使也嘉熙元年元兵自新井入詐豎宋將李顯忠之旗直趨成都黼審知其非領兵夜出城南迎戰至石筍街兵散力戰死之

王翊字公輔郫縣人寶慶元年進士吳曦招之入幕曦以蜀叛翊為陳大義曦怒囚之及曦誅而免嘉熙元年

制置使丁黼辟為參議官元兵至黼倉卒迎敵敗死翊

募兵拒守城破朝服赴井死轉運副使蒲東昭忠錄作東印

亦死之兵屠漢州權州事劉當可判官印復錄事參軍

羅由司戶參軍趙崇啓知雒縣羅君文皆不屈死復雍  
六世孫也入眉州知丹陵縣馮仲煜死之取簡州簡守  
李大全死之邛守趙晨親率雅州牌手出戰力盡而死  
師至遂寧民兵趙朋拒戰左臂已斷而戰不休卒死之  
至重慶進士胡天啓負母逃兵殺其母天啓與其妻呼  
天大罵遂同死事聞皆褒卹有差寶祐六年元兵拔吉  
平隘守將楊禮周德榮死之拔長寧守將王佐父子俱  
死至閬州推官趙廣死之至蓬州轉運使施擇善死之

至順慶帥司段元鑑城守麾下劉淵殺之以降

陳隆之為四川制置使淳祐元年十一月成都被圍固  
守彌旬弗下部將田世顯乘夜開門元兵突入隆之舉  
家皆死檻送隆之至漢州命諭守臣王夔降隆之呼夔  
語曰大丈夫死爾毋降也遂見殺後贈徽猷閣待制特  
與兩子恩澤賜諡又有史季儉者威州棋城主簿也成  
都之陷子良震與壻楊城夫爭相為死各特贈兩官與  
一子下州文學

何充漢州德陽人秘書監耕之孫通判黎州攝州事城破充自刺不死元軍帥呼之語使署招民榜充曰吾監州也一家死耳榜不可署自是水飲絕不入口敵知其不可強斬之初充見呼其妻陳以一家隨往帥曰不呼汝也陳曰吾求死耳及充死東望再拜曰吾夫婦對趙氏無愧矣衆以石擊殺之同死者四十餘人

陳元桂撫州人淳祐四年進士累官知臨江軍開慶元年春元兵至臨江時制置使徐敏子在隆興頓兵不進

元桂登城坐北門亭上督戰矢石如雨吏卒勸之避去  
不從有以門廊鼓翼蔽之者麾之使去有欲抱而走者  
元桂曰死不可去此左右走遁師至元桂瞠目叱罵遂  
死之事聞贈寶章閣待制官其二子諡曰正節

許彪孫顯謨閣學士奕之子也為四川制置司參謀官  
景定二年劉整叛召彪孫草降文彪孫辭使者曰此腕  
可斷此筆不可書也即閉門與家人仰藥死整既降遂  
引兵襲都統張桂營桂及統制金文德戰死納溪曹顛

闔門死之景定四年沔州都統胡世全護糧運至虎象山遇敵兵戰敗死咸淳二年元兵取開州守將龐彥海死之德祐元年瀘守梅應春殺判官李丁孫推官唐奎瑞以城降珍州守將江彥清巷戰死之

張順民兵部將也襄陽受圍五年詔李庭芝移屯郢州援之

據李庭芝傳及宋元通鑑增

偵知襄陽西北一水曰清泥河源

於均房即其地造輕舟百艘以三舟聯為一舫中一舟裝載左右舟則虛其底而掩覆之出重賞募敢死者三



千人求將得順與張貴以為都統軍中呼貴曰矮張順  
曰竹園張智勇並出諸將上出令曰此行有死而已不  
能死者去毋敗吾事人人感奮是時五月漢水方生發  
舟進圍山下越二日進高頭港口結方陳各舟置火槍  
火砲熾炭巨斧勁弩夜漏下三刻起矧出江以紅燈為  
識貴先登順殿之乘風破浪徑犯重圍至磨洪灘以上  
望見元舟師佈滿江面無隙可入衆乘銳斷鐵絙攢杙

數百

按昭忠錄云元兵迎敵近南船躍入溺  
死萬計與前無底舟可互証謹附錄

轉戰百二

十里黎明抵襄陽城下城中久絕援聞救至踴躍氣百倍及收軍獨失順越數日有浮屍遡流而上被甲冑執弓矢直抵浮梁視之順也身中四槍六箭怒氣勃勃如生軍中驚以為神結冢斂葬張貴既抵襄襄帥呂文煥留共守城貴恃其驍勇欲還郢乃募二士能伏水中數日不食者使持蠟書赴郢求援於時元兵增守益密水路連鎖數十里列撒星椿雖魚蝦不得度二人遇椿以鋸斷之竟達郢還報許發兵五千駐龍尾洲以助夾擊

刻日既定以七月七日

原傳不載月日  
今據昭忠錄補

別文煥東下點

視所部泊登舟帳前一人亡去乃有過被撻者貴驚曰  
吾事洩矣亟行彼或未及知即舉炮發舟乘夜順流斷  
絙破圍所過辟易既出險夜半薄小新城元兵邀擊死  
戰沿岸束荻列炬火光燭天至勾林灘漸近龍尾洲遙  
望軍船旗幟紛披貴軍喜躍舉流星火示之軍船見火  
即前迎及勢近欲合則來舟皆元兵也蓋郢兵前二日  
以風水驚疑退屯三十里而元兵得逃卒之報據龍尾

洲以逸待勞貴戰已困出於不意殺傷殆盡身被數十  
創見執不屈死之元軍命降卒四人拜尸至城下曰識  
矮張乎此是也守陴者皆哭城中喪氣文煥斬四將以  
貴附葬順冢

牛富霍邱人為侍衛馬軍司統制戍襄陽五年移守樊  
城累戰不為衄且數射書襄陽城中遺呂文煥相與固  
守兩城為唇齒凡六年城破富率死士巷戰渴飲血水  
轉關前遇民居燒絕街道身被重傷以頭觸焦柱赴火

死贈靜江軍節度使諡忠烈裨將王福亦赴火死

范天順荆湖都統也襄陽受圍天順日夕守戰尤力及

呂文煥出降天順仰天嘆曰生為宋臣死當為宋鬼遂

縊死

按宋元通鑑載范天順之死在咸淳九年正月呂文煥出降在是年二月與傳互異

贈定江

軍承宣使官其二子

呂文信文德之弟也仕至武功大夫沿江副司諮議官

德祐初帥舟師次南康斛林夾白鹿磯與元兵遇戰死

特贈定遠軍承宣使河湖砦巡檢張興宗亦死之贈武

翼郎皆官其子

趙文義郢州都統制更戍歸與元兵遇力戰死之先是開州之役文義兄武義亦死焉又有楊壽孫者為雲安軍主簿兼教參佐忠勝軍端平中元兵至中江縣與將官何庚安惟臣田廣澤等數人連戰二日俱死之壽孫贈通直郎庚等各贈承節郎官其子

邊居誼

本紀作居義

隨人也初事李庭芝積戰功至都統制

咸淳十年以京湖制置帳前都統守新城居誼善御下

治戰守之具有法時元兵破沙陽

元史作沙洋

執守將王大

用呂文煥曰新城小壘可不攻破也居誼率舟師拒之  
文煥列沙陽所斬首招降不從明日縛大用至壁下使  
呼曰邊都統急降不然禍即至矣居誼答曰吾欲與呂  
參政語文煥以為降已也馳馬至伏弩亂發馬仆幾鉤  
得之衆挾文煥易馬奔越二日總制黃順出東門降明  
日使順來招之又呼其部曲部曲欲縋城出居誼悉驅  
斬之文煥乃麾兵攻城蟻附而上居誼悉取金散將士

往來督戰會暮破浸漢樓樓火延民居居詎走還第拔

劍自殺不殊赴火死事聞贈利州觀察使

按元史巴延傳載居詎自

楚死後遂併誅沙洋守將王虎臣王重用等四人傳未詳載謹附識

趙邠發

元史巴延傳作邠發

字漢卿昌化人淳祐十年登第遂為

寧州司戶潼川簽判尋罷咸淳七年起為彭澤令十年

權通判池州元兵渡江池守王起宗棄官去邠發攝州

事繕壁聚糧為守禦計明年正月元兵至李王河都統

張林屢諷之降邠發忿氣填膺瞠目視林不能出言越



日林以兵出巡江陰降敵歸而陽助邠發為守守兵僅  
五百人邠發知不可為乃置酒與親友飲訣謂其妻雍  
氏曰城將破吾守臣不當去汝先出走雍氏曰君為忠  
臣我獨不能為忠臣婦乎邠發哂之雍氏曰吾請先君  
死邠發笑止之乃盡散其家資與其弟姪僕婢悉遣之  
出二月兵薄池邠發晨起書几上曰君不可叛城不可  
降夫妻同死節義成雙與雍盛服同縊從容事聞贈  
華文閣待制諡文節雍氏贈順義夫人錄二子為京官

唐震字景實會稽人既登第為小官權貴有以牒薦之者震內牒篋中既而還之封題未啓咸淳中由大理司直通判臨安府六年知信州擢浙西提刑忤賈似道去十年起知饒州時興國南康江州諸郡並降元元兵畧饒饒兵止千八百人震發州民守城上書求援不報元使人入饒取降款通判萬道同陰斂白金牛酒備降禮風震降震叱之曰我忍偷生負國邪臣城中少年感震言殺使者明年二月兵大至都大提舉鄧益遁去震盡

出府中金錢書官資揭於城募有能出戰者賞之衆懼不能戰元兵登陴衆遂潰震入府中玉芝堂其僕前請曰番江門兵未合出猶可免震罵曰城中民命係於我民死我何面目獨生邪有頃兵入執牘鋪案上使震署降震擲筆於地遂死之兄椿與家人俱死贈華文閣待制諡忠介官其二子震客馮驥後守獨松關何新之守閩之新壘皆戰死

司馬夢求叙州人溫國公光之後也母程歸及門夫死

誓不他適夢求其族子取以為後景定三年舉進士咸淳末調江陵沙市監鎮沙市地勢險固恃水為防德祐元年湖水忽涸元兵橫過中道乘南風縱火都統程文亮降夢求朝服望闕再拜自縊死

耿世安為武翼大夫淮東副總管兩淮都撥發官諜報元兵至制置使賈似道調世安提兵往漣水軍增戍衆方猶豫世安徑至漁溝以三百騎入陳慶擊身被七創猶能追殺既還兵而沒事聞贈五官

李成大字實夫南康軍建昌人文定公迪從子也寶祐四年進士德祐初知金壇縣元兵至與寄居官潘大同大本率民兵巷戰不勝大同兄弟死之吏民挾成大降乃潛與胡用存謀復金壇事泄繫獄拷掠不屈殺其二子以懼之亦不屈率殺之事聞贈朝散大夫直秘閣謚忠節

趙孟錦少不羈遊淮以軍功為將佐元兵攻真州每戰輒先士卒元重艦駐江上孟錦乘大霧襲之俄霧解日

已高元兵見其兵少逐之登舟失足身荷重鎧死焉元  
兵入真州守將苗再成死之

按孟錦舊附趙興擇傳今以其死於江左與從二王

死者不同時

謹移置於此

陶居仁太平蕪湖人仕為鎮江錄事參軍元兵破鎮江  
居仁見執抑使降居仁曰吾固知世運窮矣詎求苟生  
以失忠義邪遂見殺

尹玉寧都人以捕盜功為贛州三峇巡檢從文天祥勤  
王及天祥至平江調玉同淮廣二軍拒元兵戰於伍牧

軍敗諸將皆遁惟玉殘兵五百殊死戰玉手殺數十人  
箭集於胷如蝟毛竟被執元軍橫四槍於其項以槌擊  
之死餘兵猶夜戰殺人馬蔽田間無一降者後贈濠州  
團練使官其二子

陳焄字光伯常州人登第為丹徒縣尉兩淮制置司參  
議官改知朐山縣仍兼主管機宜文字丁母憂歸元兵  
至常守臣趙與鑿走匿郡人錢嘗以城降會淮民王通  
居常州謀復之陰以書約劉師勇許為內應師勇遂復

常州走錢訾於是朝議以姚希得子訾知常州訾故知  
焘辟為通判或謂焘曰今辟難有辭矣焘曰鄉邦淪沒  
何敢偷生墨衰而出訾入常甫十餘日元軍再至焘等  
率義兵戰禦數月不能下以功加帶行提轄文思院適  
常將張彥降敵盡言常城中虛實遂急攻之焘與訾固  
守再加訾太府寺丞焘幹辦諸軍糧料院常將士皆轉  
五官攻益急常兵阻壕水為陳矢盡城破訾死之焘猶  
斂兵巷戰不敵死焉事上追贈訾龍圖閣待制希得贈



太師焘直寶章閣並官其子

王安節節度使堅之子也少從其父守合州有功咸淳末為東南第七副將德祐初賈似道潰師蕪湖列城皆降時安節駐兵江陵即走臨安上疏乞募兵為捍禦計授闔門祇候浙西添差兵馬副都監收兵入平江合張世傑兵戰鳳凰港有功轉三官劉師勇復常州擊走王良臣以安節守常已而良臣尊元兵攻常常城圯惡安節築柵相拒兩月丞相巴延自將攻之屢招降不下巴

延怒麾兵破其南門安節揮雙刀率死士巷戰臂傷被  
執有求其姓名者安節呼曰我王堅子安節也降之不  
可乃殺之

黃介字剛中隆興分寧人喜兵法夏貴辟充廣濟簿尉  
後家居帥鄉民登龍安山為保聚計德祐元年元兵至  
砦衆奔潰介堅守不出顧謂家僮陳力曰爾盡力勿走  
力曰主在生死同之介身被鏃如蝟面頸中十三矢倚  
柵而死力亦死妻劉被掠子用中逃得不死及壯求母

四方逾十年得於京師以歸州里稱為黃孝子云

密佑其先密州人後渡淮居廬州累官至廬州駐劄御  
前遊擊中軍統領改權江西路副總管咸淳十年以闔  
門宣贊舍人為江西都統明年二月朱禩孫遣高士傑  
復鄂州阿爾哈雅以兵逆擊執世傑餘兵潰入江西江  
西制置黃萬石招集之且募寧都廣昌南劍義兵千餘  
人盡以屬佑十一月元兵至隆興劉槃兵敗嬰城自守  
萬石時移治撫州將遁懼佑不從乃調佑兵援槃未至

隆興樂已降而元帥張榮實呂師夔撫兵逼撫州佑率衆逆之進賢坪兵來呼曰降者乎鬪者乎佑曰鬪者也麾其兵突戰進至龍馬坪元兵圍之數重佑告其部曰今日死日也若力戰或有生理衆咸憤厲自辰戰至日昃佑面中矢拔之復戰身被四矢三槍餘騎僅數十人佑舞雙刀斫圍南走前渡橋馬踏橋板斷遂被執衆戒勿殺與歸隆興元帥宋都木達曰壯士也欲降之繫之月餘命劉樂呂師夔坐城樓引佑樓下以金符遺之許

以官佑不受語侵槃師夔又令其子說之曰父死子安  
之佑斥曰汝行乞於市第云密都統子誰不憐汝怡然  
自解其衣請刑遂死

米立淮人三世為將從陳奕守黃州奕降立潰圍出江  
西制置使黃萬石署為帳前都統制元兵畧江西立迎  
戰於江坊被執不降行省遣萬石諭之立曰侍郎為國  
大臣立一小卒耳但三世食趙家祿趙亡何以生為遂

遇害

李芾字叔章其先廣平人徙居汴高祖升起進士靖康  
中金人破汴以刃迫其父升前捍之與父俱死曾祖椿  
徙家衡州芾初以蔭補南安司戶改祁陽尉攝縣辟湖  
南安撫司幕官時盜起永州招之歲餘不下芾與參議  
鄧垌提千三百人破其巢擒賊魁蔣時選父子以歸餘  
黨遂平累官浙東提刑知温州咸淳元年入知臨安府  
時賈似道當國前尹事無鉅細先關白始行芾獨無所  
聞嘗出閱火具民有不為具者問之曰似道家人也立

杖之似道大怒使臺臣黃萬石誣以贓罪罷之元軍取  
鄂州始起為湖南提刑時郡縣盜擾民多奔竄芾令所  
部發民兵自衛縣與一皂幟令曰作亂者斬幟下民始  
帖然乃發兵擇壯士三千人遣將勤王別召民兵集衛  
為守備未幾似道兵潰蕪湖復芾官知潭州兼湖南安  
撫使時湖北州郡皆已降元其友勸芾勿行芾泣曰我  
以家許國矣時值所愛女死一慟而行德祐元年七月  
至潭潭兵調且盡乃結溪峒蠻為聲援柵江修壁命劉

孝忠統諸軍吳繼明自湖北至陳義陳元自戍蜀歸芾  
奏請留之戍潭推誠任之皆得其死力元右丞阿爾哈  
雅既下江陵分軍戍常德遏諸蠻而以大兵入潭芾遣  
其將于興禦之於湘陰興戰死九月元軍遂圍城芾慷  
慨登陴與諸將分地而守民老弱皆出不令而集十月  
兵攻西壁孝忠輩奮戰芾親冒矢石以督之城中矢盡  
有故矢皆羽敗芾令括民間羽扇羽立具又苦食無鹽  
芾取庫中積鹽席焚取鹽給之死傷相籍人猶飲血乘



城殊死戰有來招降者芾殺之以徇十二月城圍益急  
孝忠中礮風不能起諸將泣請曰事急矣吾屬為國死  
可也如民何芾罵曰國家平時所以厚養汝者為今日  
也汝第死守有後言者吾先戮汝除夕元兵登城衛守  
尹穀及其家人自焚芾命酒酌之參議楊霆赴園池死  
芾坐雄湘閣名帳下沈忠遺之金曰吾分當死吾家人  
亦不可辱汝盡殺之而後殺我忠伏地叩頭辭芾固命  
之忠泣而諾取酒飲其家人盡醉乃徧刃之芾亦引頸

受刃忠縱火焚其居還家殺其妻子復至火所大慟乃  
自刎幕屬茶陵顧應焱安仁陳億孫皆死潭民間之多  
舉家自盡城無虛井縊林木者累累相比繼明等以城  
降

按元史阿爾哈雅傳是時同希  
死者尚有轉運使鍾瑩英謹識

陳義潰圍將奔閩中

道戰死事聞贈端明殿大學士諡忠節

尹穀字耕叟潭州長沙人登進士第調常德推官知崇  
陽縣用薦擢知衡州需次於家潭城受兵帥臣李希禮  
以為參謀共畫備禦策時城中壯士皆入衛臨安所餘

軍僅四百五十人老弱大半芾糾勵民丁以義固守三月城不下元軍斷絕險要穀知城危與妻子訣曰吾以寒儒受國恩不可屈若輩從吾死耳召弟岳秀使出以存尹氏祀岳秀泣而許之已乃積薪扃戶朝服望闕拜已即縱火自焚闔門少長皆死

楊霆字震仲以父大異恩奏補將仕郎銓試第一授修職郎挂嶺主簿五中漕舉改鄂州教授累官通判江陵府丁內艱德祐初起復奉議郎湖南安撫司參議與安

撫使李芾協力戰守寔有心計善出奇應變帥府機務芾一以委之城初被圍日夜守禦數日西北隅破寔麾兵巷戰暮築月城比旦城復完以死守之城既破寔赴水死妻妾奔救不及皆死

趙良淳字景程居饒之餘干丞相汝愚曾孫也以蔭為泰寧主簿三遷至淮西運轄改知分寧縣秩滿特差權江西安撫司機宜文字升大理司直咸淳末知安吉州尋以徐道隆為浙西提刑以輔良淳加良淳直秘閣范

文虎遣使招降良淳斬其使元兵迫獨松關有旨趣道隆入衛道隆去而元兵已軍東西門矣良淳率衆城守夜就菱舍陴上先是朝廷遣將吳國定援宜興國定不敢入宜興而之安吉見良淳願留備守禦良淳信之為請於朝留戍安吉已而國定開南門納外兵兵入城呼曰衆散元帥不殺汝於是衆號泣散去良淳命車歸府閉閣自縊有入解救之者復蘇因泣勸曰侍郎何自苦良淳叱出之復投繯而死

徐道隆字伯謙婺州武義人父煥知南雄道隆以任補  
職累官潭州判官權知全州荆湖制置使汪立信奏辟  
為參議官及立信內遷趙孟傅為制置使以道隆參其  
軍事遂為提點刑獄尋有旨命道隆措置安吉潰卒范  
文虎程鵬飛管景模俱遣書誘降道隆焚書斬使元兵  
至臨平皋亭山間道入援時道絕不通議由太湖經武  
康臨安縣境勤王即日乘舟出臨湖門泊宋村德祐二  
年正月朔旦元兵追及道隆以江陵親從軍三百人殊

死戰矢盡槍槩折一軍盡沒道隆見執乘守者少急赴  
水死長子載孫亦赴水死餘兵有脫歸者言於朝命贈  
官賜諡官其子孫

欽定續通志卷五百十四



欽定四庫全書

欽定續通志卷五百十五

忠義傳

宋五

高應松

徐應鑣

姜才 洪福

趙淮

宋應龍

褚一正  
胡拱辰

趙與擇

趙孟壘

趙孟采

鍾季玉 潘方

馬陞 婁鈴轄

鄧得遇

劉子薦 黃文政

陳文龍 璜

林空齋

陳牽 年

吳楚材

蕭雷龍

劉士昭

趙時賞

趙希洎 必向

鄒瀨

劉子俊  
蕭燾夫

劉沐  
陳繼周

孫稟  
陳龍復

彭震龍  
張鏜

張雲  
杜許

張沐  
林琦

呂武  
蕭資

鞏信  
徐臻

蕭明哲  
金應

張珏

上官夔  
包申

王世昌  
趙立

馬堃  
趙酉泰

王仙

曹琦

陸秀夫 劉鼎孫

張世傑

莫謙之

徐道明

高應松開慶元年進士繇衡州教授通判廣德軍召為國子監丞權禮部員外郎翰林權直元兵自湧金門入舉朝奔竄從官留者九人應松其一也進端明殿學士簽書樞密院事從瀛國公至燕絕粒七日卒

按此傳後宋史舊附

張山翁黃申兩傳雖屬秉節不屈以其隱居終老茲俱移入獨行傳

徐應鑣字巨翁衢之江山人咸淳末試補太學生德祐二年瀛國公入燕三學生百餘人皆從行應鑣不欲從乃與其子琦松女元娘誓共焚死子女皆喜從之太學

故岳飛第有飛祠應鑣具酒肉祀飛曰天不祐宋社稷  
為墟應鑣誓死闔家與俱死將魂魄累王作配仰王英  
靈永永罔艾琦亦賦詩自誓祭畢以酒肉醉諸僕應鑣  
乃與其子女入梯雲樓積諸房書籍四周縱火自焚一  
小僕聞火聲寤起至樓下穴牖窺之應鑣父子儼然坐  
立如廟中塑像走報諸僕壞壁入撲滅火應鑣不克死  
與其子女怏怏出戶莫知所之翌日得其屍祠前井中  
皆僵立瞳目如生人諸僕為具棺斂殯之西湖金牛僧

舍蓋王立福州褒其節贈朝奉郎祕閣修撰後十年其  
同舍生劉汝鈞收葬之方家峪

姜才濠州人貌短悍隸淮南兵中以善戰名為通州副  
都統臨陣軍律凜凜其子當戰回白事才望見以為敗  
也拔劍馳逐幾殺之賈似道出師才以兵屬孫虎臣及  
虎臣軍潰才收兵入揚州元兵乘勝攻揚州才為三疊  
陣逆之三里溝戰有功又與元帥戰揚子橋日暮兵亂  
流矢貫才肩才拔矢揮刀而前所向辟易已而元軍築

長圍自揚子橋竟瓜洲東北跨灣頭至黃塘西北至丁村務欲以久困之時德祐元年明年正月宋遂亡五奉使持謝太后詔來諭才射却之復以兵擊敗於召伯堡未幾瀛國公至瓜洲才與庭芝涕泣誓將士出奪之以四萬人夜擣瓜洲戰三時衆擁瀛國公避去才進戰至浦子市夜猶不退阿珠使人招之才曰吾寧死豈作降將軍邪四月才以兵攻灣頭柵五月復攻之騎旋寧而止乃舍騎步戰至四鼓全師以歸揚食盡才時出運米

真州高郵以給兵元萬戶史弼將兵至馬家渡伺奪之才與戰達旦弼幾殆阿珠馳兵來援乃得免庭芝以在圍久召才屏左右語久之第聞才厲聲云相公不過忍片時痛耳左右聞之俱汗下才自是以兵護庭芝第期與俱死七月益王在福州以龍神四廂都指揮使保康軍承宣使召才與庭芝東至泰州將入海阿珠以兵追及圍泰州使使者招之降才不聽阿珠驅揚兵士妻子至城下會才疽發背不能戰諸將遂開門降都統曹安

國入才卧内執之以獻阿珠愛其勇欲降而用之才輒  
謾罵阿珠責庭芝不降才曰不降者才也並憤詆不已  
阿珠怒曷之揚州才臨刑夏貴出其旁才切齒曰若見  
我寧不媿死耶有洪福者夏貴家僮也從貴積勞為鎮  
巢雄江左軍統制鎮江北貴出降元福與子大淵大源  
下班祇候彭元亮統貴軍拒之加右武大夫知鎮巢貴  
招福不聽使其從子往福斬之元兵攻城久不拔遣貴  
至城下好語語福請單騎入城福信之門發而伏兵起



執福父子屠城中貴蒞殺大源大淵諱曰法止誅首謀  
何至舉家為戮福叱曰以一命報宋朝何至向人求活  
耶次及福福大罵數貴不忠請身南向死以明不背國  
也

趙淮丞相葵之從子也累官至淮東轉運使德祐中戍  
銀樹壩兵敗與其妾俱被執至瓜洲元帥阿珠使淮招  
李庭芝許以大官淮至城下大呼曰李庭芝男子死耳  
毋降也阿珠怒殺之棄屍江濱

宋應龍者儒生通兵出入行幕三十年為諮議官寓秦州德祐二年元兵至秦州城降應龍與其妻自縊於圃中是時提刑諮議褚一正督戰高沙被創沒於水知興化縣胡拱辰縣破亦死之一正字粹翁廬州人

趙與擇

本紀作與畢

為嗣秀王德祐二年為浙閩廣察訪使

益王之立舅楊亮節居中秉權與擇多所諫止諸將俱憚之未幾元兵逼浙東乃命與擇出瑞安與守臣方洪共任備禦瑞安受圍與洪誓以死守小校李雄夜開門

納外兵與擇洪率衆巷戰兵敗被繫董文炳問之曰汝  
為秀王耶能降乎與擇厲聲曰我國家近親力屈而死  
何問為遂死之洪亦仗節而死

趙孟壘合州人登開慶元年第為金華尉臨安降懷太  
皇太后帛書詣益王擢宗正寺簿監軍復明州戰敗見  
獲不屈磔死

趙孟朶福王與芮從子也元兵駐紹興孟朶謀舉兵被  
執至臨安范文虎詰其謀逆孟朶詬曰賊臣負國共危

社稷我帝室之胄欲一刷宗廟之恥乃以為逆乎文虎

怒驅出斬之

按趙孟壘孟益舊俱附劉士昭傳後今並析為專傳

鍾季玉饒州樂平人淳祐七年舉進士調為都大坑冶屬改知萬載縣淮東制置使李庭芝薦之遷審計院改宗正寺簿又遷樞密院編修出知建昌軍後以江西轉運判官名為祕書丞改都大提點坑冶元兵渡江季玉徙寓建陽兵至不屈死之有潘方者温州平陽人寶祐四年進士調監慶元府市舶慶元降附方不屈赴水死

馬陞宕昌人一家父叔兄弟皆以忠勇為名將而陞與  
兄堃特顯咸淳中陞知欽州又徙知邕邕地接六詔安  
南傍通諸溪峒鎮撫諸蠻邊陲晏然廣西經畧李興上  
其功加閣門宣贊舍人未幾以左武衛將軍徵入朝已  
而宋亡陞因留兵靜江總屯戍諸軍護經畧司印守城  
德祐二年元平章阿爾哈雅攻廣西陞發所部及諸峒  
兵守靜江而自將三千人守嚴關鑿馬坑斷嶺道元兵  
攻嚴關不克乃以偏師入平樂過臨桂夾攻陞陞兵敗

退保靜江元使人招降陞發弩射之攻三月陞前後百餘戰城中死傷相藉訖無降意城東隅稍卑元軍陽攻西門以精兵夜決水牕從東破其外城陞閉內城內城破率死士巷戰被執殺之斷其首猶握拳奮起立逾時始仆時邕守以城降獨陞部將婁鈐轄以二百五十人守月城不下阿爾哈雅笑曰是何足攻圍之十餘日婁從壁上呼曰吾屬饑不能出降苟賜之食當聽命乃遺牛數頭米數斛一部將開門取歸復閉壁元軍乘高望

之兵皆分米炊未熟生鬻牛啖立盡鳴角伐鼓諸將以  
為出戰也甲以待婁乃令所部擁一火礮然之聲如雷  
震震城城崩煙氣漲天外兵多驚死者火熄入視之灰  
盡無遺矣

鄧得遇字達夫邛州人淳祐十年進士調寧遠主簿改  
知南昌縣通判隆興府監行在藏庫出知昭州遷廣西  
提點刑獄逾年攝經畧事兼知靜江府德祐二年靜江  
破得遇朝服南望拜辭投南流江而死

劉子薦字貢伯吉州安福人父夢驥以進士歷官知澧州沒於王事子薦以父任為湘鄉尉調撫州司錄改知贛縣監行在左藏庫通判常德府知融州以廉靜著聞主管仙都觀廣西經畧司檄為參議官德祐二年十一月元兵至靜江權經畧使馬璽遣子薦提瑤兵藥弩手守城東門勢不支時瀛國公已入燕子薦登城北望再拜取所衣袍瘞之以誓死守或諷其遁去子薦曰死事義也何以遁為竟死之有黃文政者准人戍蜀軍潰間



道走靜江馬暨邀與同守城破文政被執大詬不屈元  
兵斷其舌以次劓則之文政叱死叱咄不絕聲

陳文龍字君貴福州興化人丞相俊卿之後也初名子  
龍咸淳五年廷對第一度宗易其名由鎮東軍節度判  
官歷崇政殿說書數年拜監察御史襄陽被圍久賈似  
道日縱淫樂不少加意文龍上疏極言其失范文虎總  
師無功似道庇之以知安慶又除趙潛知建康黃萬石  
知臨安文龍言文虎失襄陽今反見擢用是當罰而賞

也潛乳臭小子何以任大閫之寄萬石政事怠荒以為  
京尹何以能治請皆罷之似道大怒黜知撫州旋使臺  
臣李可劾罷之未幾呂文煥尊元軍東下范文虎首迎  
降與文煥俱東似道兵潰魯港潛最先遁以故列城從  
之皆遁始悔不用文龍之言起為左司諫尋遷侍御史  
時邊事甚急王爚與陳宜中不能畫一策而日坐朝堂  
爭私意文龍上疏請召大臣同心圖治無滋虛議其後  
宜中與爚終不相能而去事已不可為矣未幾議降乃

上章乞歸益王稱制於福州以文龍參知政事漳州叛以文龍為閩廣宣撫使討之文龍以黃恮前守漳有恩信辟為參謀官按兵泉州使恮招撫之及恮至民皆頓首謝罪興化有石手軍者能擲石中人議者以其不足用罷之石手軍亦叛復令文龍為知軍平之已而降將王世強導元軍入廣建寧泉福皆陷知福州王剛中遣使徇興化文龍斬之而縱其副以還使持書責世強剛中負國遂發民兵自守城中兵不滿千元軍來攻使其

姻家持書招降之文龍斬其使曰諸降者特畏死耳未知此生能不死乎遣其將林華偵伺境上華即降且導兵至城下通判曹澄孫開門降執文龍與其家人至軍中左右凌挫之卒不屈乃械繫送杭州文龍去興化即不食至杭餓死其母繫福州尼寺中病甚無醫藥左右視之泣下母曰吾與吾兒同死又何恨哉亦死元兵既歸文龍之姪瓚復舉兵殺林華據興化未幾城又破瓚死之

林空齋永福人失其名

按昭忠錄云名同字子真號空齋處士

舉進士歷

知縣解官家居益王立張世傑圍泉州乃率鄉人即其家開忠義局起義兵復永福縣時王積翁密約元兵至屠永福空齋盛服坐堂上見執不屈而死

陳牽字肇芳一字偉節饒州安仁人咸淳元年進士調滁州司戶參軍改荆閩糧料院調朐山主簿德祐元年秋牽由海道歸杭援南安軍教授不就還家會謝枋得起兵安仁首拔入幕執安仁令李景景牽里人也請以

家貲贖罪奉曰家財獨非朝廷錢耶聲其罪斬之景子率鄉民五千報怨奉度不敵引兵趨信州會守吏遁就攝郡事並王即位奉入覲遷宗正寺簿太府寺丞領江東安撫使出上饒接應郡縣所部才千餘人戰潰被執得間遁去後三年復起兵又敗入積煙山中自剄死弟年同時被執死焉

吳楚才名炎以字行建昌南城人德祐元年建昌降明年春楚材還其鄉領村糾集民兵時江西制置使黃萬

石授楚材迪功郎權制置使計議官且戒勿興兵楚材  
不聽自領村率衆將攻城元兵三道蹙之奪其長梯鐵  
鈎因進攻領村拒以木柵不得入事聞益王元帥府承  
制遷楚材宣議郎帶行大社令知建昌軍俾聚軍圖再  
舉萬石匿其命楚材既失利且乏援元兵誘降其衆多  
解去楚材走光澤為人所執及其子應登以獻不屈死  
焉益王立於福州贈官朝奉郎

蕭雷龍字顯辰建昌新城人景定三年進士調臨安府

學教授通判衢州州守棄城遁朝命雷龍權知府事元  
兵薄城下不降脫去還建昌建昌已降雷龍與同里人  
黃巡檢起兵為同安武人徐浚沖獲以送縣權縣尹劉  
聖仲殺之

劉士昭

昭忠錄作  
劉世起

太和人與鄉人同謀復太和縣兵敗

自縊死其黨入獄多乞憐苟免有王士敏者慷慨不撓  
臨刑歎曰恨吾病失聲不能大罵耳

趙時賞字宗白和州宗室也居太平州咸淳元年擢進



士第累官知宣州旌德縣升直寶章閣軍器大監從二  
王入闕中益王即位擢知邵武軍未幾罷之文天祥開  
都督府於南劍奏辟參議軍事江西招討副使與宗室  
孟滌提兵趣贛州取道石城復寧都縣空坑之役兵敗  
走吳溪為追兵所執不屈死之

趙希洎宗室子居宜春歷官至戶部尚書迂賈似道出  
領廣東轉運使德祐元年率潰卒勤王道經廬陵邵守  
邀其軍遂與從子必向避地贛州亂定歸里有內姻聶

嵩孫為表守勉之內款不屈文天祥兵敗與必向俱被囚不食而死

鄒瀾字鳳叔吉水人後徙永豐從文天祥勤王補武資至將軍益王立改寺丞領江西招諭副使聚兵寧都尋授江西安撫副使復興國永豐二縣進兵部侍郎兼江東西處置副使永豐之敗從天祥間闕嶺道未幾復開督府瀾分司永豐興國境上與元兵屢戰及天祥被執瀾自殺當是時從天祥勤王死事者瀾與劉子俊等凡

十有九人因次第其名附傳焉劉子俊字民章廬陵人  
與文天祥同里開天祥開督府興國召與計事補宣教  
郎帶行軍器監簿兼督府機宜空坑兵敗子俊收兵保  
洞源接應郡縣尋入廣與元兵遇戰潰復招集散亡與  
鄒鳳同趨潮州天祥兵敗子俊被執自詭為天祥意元  
兵不窮追天祥可間走也未幾別隊執天祥至各爭真  
贖至大將前始得其實乃烹子俊劉洙

文天祥傳  
作劉洙

字淵

伯廬陵人天祥起兵辟補宣教郎督府機宜天祥開府

南劍沐收部曲來會改授太府寺簿空坑兵敗被執父子同日死焉其季子復從天祥死嶺南孫臬字實甫吉州龍泉人獻簡公汴之後天祥長妹壻也天祥起兵檄補宣教郎帶行監官告院知吉州龍泉縣為叛者所陷被殺彭震龍字雷可永新人亦天祥妹壻天祥起兵補宣教郎帶行太社令知永新縣天祥出使被執震龍遁歸結峒獠起兵天祥出嶺震龍接應復永新為親黨所執至帥府腰斬之蕭燾夫永新人天祥起兵補從仕郎

以贊震龍謀復永新與兄敬夫俱死陳繼周字碩卿寧都人淳祐三年貢於鄉以捕盜功授廉州司法累遷知

吉州永豐縣改知高安縣歷廣東經畧司準備差遣會

文天祥守贛州舉兵勤王留繼周幕中授江西安撫司

準備差遣率贛士以從詔改繼周合入官帶行監文思

院差充江浙制置司主管機宜以所部夜襲元兵於南

柵門質明猶戰渴赴水死

按宋史目錄於陳繼周之下列陳龍復張鐘張雲三人姓

名而此處不為立傳亦無所附見今仍其關

張汴字朝宗一字次山蜀人天

祥起兵辟為祕閣修撰領廣東提舉督府參謀空坑兵  
敗為亂兵所殺呂武太平州步卒也文天祥出師武應  
募從行偕脫鎮江之難天祥開府南劍武以功補官遣  
之結約州縣起兵崎嶇數千里會天祥於汀梅以環衛  
官將數千人出江西以遇士大夫無禮死於橫逆一軍  
揮涕而葬之鞏信安豐軍人為荆湖都統天祥開督府  
信官至團練使同督府都統制江西招討使初至都府  
招淮士數千自隨常怏怏曰如有將無兵何天祥自興

國趨永豐元兵追其後信戰於方石嶺中數矢傷重自  
投厓石死贈清遠軍承宣使蕭明哲字元甫太和人少  
舉進士天祥開府汀州辟充督幹架閣監軍師出嶺明  
哲以贛縣民義復萬安連結諸砦拒守兵敗被執死於  
隆興杜澣字貴卿丞相範從子也德祐元年有詔勤王  
澣時宰縣糾集民兵及天祥開閩平江往附焉從之北  
至京口以計脫天祥偕走淮甸繇海道達永嘉益王即  
位授司農卿廣東提舉詔討副使督府參謀福安陷與

天祥相失遂趨行朝久之奉命復入天祥幕及空坑兵  
敗又與跋涉患難以出天祥使護海舟至官富場許徑  
趨厓山兵潰被執以憂憤卒林琦閩人也德祐二年元  
兵迫臨安琦於赭山結集忠義捍禦海道以功補宣教  
郎督府主管機宜文字兼充檢院天祥開府南劍琦佐  
其幕及潮州移屯琦被執赴水不死至建康以憂憤卒  
蕭資天祥幕下書吏也空坑兵敗以全督府印功升閩  
門路鈐轄潮陽移屯與元兵遇死之徐臻温州人德祐



元年天祥勤王臻往依之以典筆札天祥被執臻脫難復來願從天祥北行至隆興病死金應者為天祥職書

司入京補承信郎天祥奉使被執至淮東以憂憤死

按宋

史此下舊有何時傳附載陳子敬時變姓名削髮為僧子敬不知所終茲並移入獨行傳

張珏字君玉隴西瀕州人年十八從軍釣魚山以戰功累官中軍都統制寶祐末元兵攻蜀順慶廣安諸郡破竹而下明年會諸道兵圍合州珏與合守王堅協力戰守攻之九月不能下景定初堅徵入朝以馬千代之四

年以珽代千歲淳三年四月元平章賽音諤德齊提兵入壞重慶夾道出合城下珽斲舟斷江中為水城元兵數萬攻之不克遂引去合州白余玠徙治釣魚山城壁甚固珽外以兵護耕內教民墾田積粟再期公私兼足九年叛將劉整獻計統軍實喇欲築馬駿虎頂山扼三江口以圖合珽聞實喇至乃張疑兵於嘉渠口潛師渡平陽灘攻蕪菁平母德彰二城火其資糧器械統制周虎戰死馬駿城卒不就十年加寧江軍承宣使德祐元

年陞四川制置副使知重慶府五月加檢校少保徵其  
兵入衛蜀道斷不可達六月咎萬壽以嘉定及三龜九  
頂降守將侯都統戰死已而瀘叙長寧富順開達巴渠  
諸郡不一月皆下元兵圍重慶作浮梁三江中斷援兵  
二年二月珏遣張萬以巨艦載精兵斷內水橋入重慶  
四月約重慶兵出攻鳳頂諸砦珏結瀘士劉霖先坤朋  
為內應六月遣趙安破神臂門執梅應春殺之復瀘州  
重慶兵漸解去圍瀘州十二月趙定應迎珏入重慶為

制置時楊立以涪州降珏遣張萬攻走走立立復合兵來  
決戰史進張世傑戰死珏聞二王立廣中遣兵數百人  
求王所調史訓忠趙安等援瀘州明年十月萬州破守  
將上官夔死之十一月瀘州食盡人相食城遂破安撫  
王世昌自經死元兵會重慶駐佛圖關以一軍屯南城  
一軍屯朱村坪一軍屯江上十二月達州降將鮮汝忠  
破咸淳皇華城執守將馬堃軍使包申卷戰死景炎三  
年二月元兵破紹慶府執守將鮮龍湖北提刑趙立與

幕官趙酉泰皆自殺珏率衆出薰風門與大將伊蘇岱  
爾戰扶桑壩諸將從其後合繫之珏兵大潰趙安以書  
說珏降不聽安乃與帳下夜開鎮西門降珏率兵巷戰  
不支歸索鳩飲不得乃以小舟載妻子東走涪明日萬  
戶特穆爾追及於涪執之重慶降三月合州亦破珏被  
執至安西趙老庵其友謂之曰公盡忠一世以報所事  
今至此縱得不死亦何以哉珏乃解弓弦自經趙立者  
字德修重慶人第進士以上書忤賈似道被謫德祐初

起為太社令湖北提刑使蜀趣諸將入衛至重慶則咎  
萬壽已降立無以復命還至涪沉水死

王仙蜀都統也守涪州勢孤援絕宋亡之二年元兵破  
城仙自刎斷其吭不殊以兩手自摘其首墜乃死

曹琦蜀進士也知南平軍被執脫身南歸制置辟主管  
機宜文字聞都統趙安以城降就守禦地自經死

陸秀夫字君實楚州鹽城人徙家鎮江景定元年登進  
士第李庭芝鎮淮南聞其名辟至幕中時天下稱得士

多者以淮南為第一號小朝廷三遷至主管機宜文字  
咸淳十年庭芝制置淮東擢參議官德祐元年邊事急  
諸僚屬多亡者惟秀夫不去庭芝上其名除司農寺丞  
累擢至宗正少卿兼權起居舍人明年二王走温州秀  
夫與蘇劉義追從之使人召陳宜中張世傑等皆至遂  
相與立益王於福州進端明殿學士簽書樞密院事宜  
中以秀夫久在兵間知軍務每事咨訪始行秀夫亦悉  
心牋負畫旋與宜中議不合宜中使言者劾罷之張世傑

讓宜中曰此如何時動以臺諫論人宜中皇恐亟召秀夫還時君臣播越海濱庶事疏畧楊太妃垂廉與羣臣語猶自稱奴獨秀夫儼然正笏立如治朝或時在行中淒然泣下以朝衣拭淚衣盡浥左右無不悲動者屬井澳風王以驚疾殂羣臣皆欲散去秀夫曰度宗皇帝一子尚在將焉置之古人有以一旅一成中興者今百官有司皆具士卒數萬天未絕宋此豈不可為國耶乃與衆共立衛王時陳宜中往占城與世傑不協屢召不至



乃以秀夫為左丞相與世傑共秉政時世傑駐兵厓山秀夫外籌軍旅內調工役凡有所述作盡出其手雖匆遽流離猶日書大學章句以勸講祥興二年二月厓山破秀夫走衛王舟而世傑劉義各斷維去秀夫度不可脫乃仗劍驅妻子入海即負王赴海死翰林學士劉鼎孫亦驅家屬入海不死被執擄掠無完膚一夕得脫卒蹈海鼎孫字伯鎮江陵進士也

張世傑范陽人少從張柔戍杞有罪奔宋隸淮兵中阮

思聰見而竒之言之呂文德文德召為小校累功至黃州武定諸軍都統制有功轉十官歷知高郵軍安東州咸淳四年元軍築鹿門堡呂文德請益兵調世傑與夏貴赴之及呂文煥以襄陽降命世傑將五千人守鄂州

世傑以鐵鉅鎖兩城

按鄂州即鄂州元史巴延傳云鄂在漢水北以石為城宋人又於漢

水南築新郢橫鐵繩鎖戰艦即本傳所云兩城是也夾以礮弩其要津皆施杙設

攻具元軍破新城長驅而下世傑力戰元軍不得前遣人招之不聽丞相巴延陽攻嚴山隘潛舟自唐港盪舟

入漢東攻鄂鄂降世傑提所部兵入衛道復饒州乃入  
朝時方徵諸將勤王多不至獨世傑來上下歎異不數  
月累官至保康軍承宣使總都督府兵遣將四出取浙  
西諸郡復平江安吉廣德溧陽諸城兵勢頗振七月與  
劉師勇諸將出師焦山世傑兵亂大敗奔圖山尋擢龍  
神衛四廂都指揮使十月進沿江招討使改制置副使  
兼知江陰軍已而元軍至獨松關召文天祥入衛以世  
傑為保康軍節度使知平江尋亦召入衛加檢校少保

德祐二年正月元軍逼臨安世傑請移三宮入海而與天祥合兵背城一戰丞相陳宜中以方遣人請和止之未幾和議亦沮元軍至臯亭山世傑乃提兵入定海石國英遣都統卞彪說之使降世傑以為彪來從已俱南也推牛享之酒半彪從容為言世傑大怒斷其舌磔之巾子山四月從二王入福州五月與宜中奉昱為主拜簽書樞密院事王世強尊元軍攻之世傑乃奉益王入海其冬元招討劉深攻淺灣世傑兵敗移王居井澳深

復來攻世傑戰却之遂徙碭州景炎三年四月益王玠  
衛王昺立拜世傑少傅樞密副使戰輒不利世傑以碭  
州不可居徙王新會之厓山八月封越國公明年元張  
弘範等兵至厓山或謂世傑曰北兵以舟師塞海口則  
我不能進退盍先據海口幸而勝國之福也不勝猶可  
西走世傑恐久在海上人有離心乃曰頻年航海何時  
已乎今須與決勝負悉焚行朝草市結大舶千餘作木  
砦為死守計已而弘範兵至據海口樵汲道絕兵茹乾

糧十餘日渴甚下掬海水飲之海水鹹飲即嘔泄兵大困世傑率蘇劉義方興日大戰弘範得世傑甥韓命以官使三至招之世傑歷數古忠臣曰吾知降生且富貴但為主死不移耳二月癸未弘範等攻厓山世傑敗走衛王舟元軍薄中軍世傑乃斷維以十餘艦奪港去後還收兵厓山劉自立擊敗之降其將方遇龍葉秀榮章文秀等四十餘人世傑復欲奉楊太妃求趙氏後立之俄颶風壞舟溺死平章山下劉師勇者廬州人以戰功

歷環衛官姚言復常州師勇亦以淮兵取呂城朝廷加  
師勇和州防禦使助言守常而以張彥守呂城合兵拒  
元軍會彥見執呂城失守常州勢益孤元軍寘彥城下  
招降師勇以大義斥之去又遣范文虎來諭師勇伏弩  
射走之常受圍數月援絕城陷師勇拔柵戰且行其弟  
馬墮墜躍不能出師勇舉手與訣而去淮軍數千人皆  
鬪死師勇從二王至海上見時事不可為憂憤卒葬於  
鼓山

莫謙之常州宜興僧也德祐元年糾合義士捍禦鄉閭  
詔為溧陽尉是冬沒於戰贈武功大夫時萬安僧亦起  
兵舉旗曰時危聊作將事定復為僧旋亦敗死

徐道明常州天慶觀道士也為管轄賜紫德祐元年元  
兵圍城道明入謁郡守姚訢退而慨然告其徒曰姚公  
誓與城俱亡吾屬亦不失為義士及兵屠城道明危坐  
煇香讀老子書其聲琅然兵以刃脅之不為動遂死焉

欽定續通志卷五百十五



欽定四庫全書

欽定續通志卷五百十六

忠義傳

遼

臣等謹案遼史忠義之臣散見列傳今採其事蹟  
尤著者補為一卷用符鄭志體例而仍以捐生效  
節為重焉

蕭巖壽

耶律薩喇

蕭蘇色

耶律托卜嘉

蕭巖壽伊實部人性剛直尚氣任重熙末道宗即位皇太后屢稱其賢由是進用帝出獵較巖壽典其事未嘗高下於心帝益重之歷文班太保同知樞密院事咸雍四年從耶律仁先伐準布破之有詔留屯亡歸者衆由是鑄兩官十年討德呼勒部有功為其部節度使太康元年同知南院宣徽使事遷北面林牙密奏伊遜以皇太子知國政心不自安與張孝傑數相過從恐有陰謀

動搖太子帝悟出伊遜為中京留守

按中京原訛上京今據本紀及伊遜

薩喇等傳改

會伊遜生日帝遣近臣耶律拜薩巴賜物為壽

伊遜欲誣巖壽因私屬白帝臣見姦人在朝陛下孤危身雖在外竊用寒心拜薩巴還以聞帝遣人賜伊遜車諭曰無慮弗用行將召矣由是反疑巖壽出為順義軍

節度使伊遜復入為樞密使流巖壽于威路終身拘作巖壽雖竄逐恒以社稷為憂時人為之語曰以狼牧羊何能久長三年伊遜誣巖壽與謀廢立事執還殺之乾

統間贈同中書門下平章事繪像宜福殿巖壽廉直面折廷諍多與伊遜忤故及於難

耶律薩喇字董隱南院大王穆爾古之孫為人忠直沈厚始任清寧初累遷西南面招討使以治稱咸雍九年改北院大王未幾為契丹行宮都部署太康二年耶律伊遜為中京留守詔百官廷議欲復召之羣臣無敢正言薩喇獨奏曰蕭巖壽言伊遜有罪不可為樞臣故陛下出之今復召恐天下生疑三諫不納左右為之震悚

伊遜復為樞密使見薩喇讓曰與君無憾何獨異議薩  
喇曰此社稷計何憾之有伊遜誣薩喇與蘇色同謀廢  
立詔按無迹出為始平軍節度使及蕭額圖瑋誣首遣  
使殺之乾統間追封漆水郡王繪象宜福殿仍追贈三  
子官爵

蕭蘇色字圖勒錦圖魯卜部人賦性沈毅始任重熙間  
累遷右護衛太保富珠哩叛從耶律義先往討執首亂  
托多羅以歸清寧中歷北面林牙彰圖軍節度使入為

北院樞密副使咸雍十年經略西南邊撤宋堡障戍以皮室軍帝嘉之太康二年知北院樞密使耶律伊遜權寵方盛附麗者多至通顯蘇色未嘗造門伊遜銜之誣構蘇色首謀廢立按之無驗出為上京留守伊遜復令蕭額圖瑛以前事誣告帝怒不復加訊遣使殺之時方盛暑尸諸原野容色不變烏鵲不敢近乾統間追封蘭陵郡王繪像宜福殿

耶律托卜嘉字薩巴系出季父房父果嘉仕至林牙重


熙間破夏人於金肅軍有功焉托卜嘉清寧中補牌印  
郎君累遷永興宮使九年平重元之亂以功知點檢司  
事賜平亂功臣為懷德軍節度使咸雍五年遷約尼剋  
太康三年授北院宣徽使耶律伊遜謀害太子托卜嘉  
知其姦欲殺伊遜及蕭德勒岱蕭寔沙等伊遜知之令  
其黨誣構托卜嘉與廢立事殺之乾統間追封漆水郡  
王繪像宜福殿

蕭和克字阿爾斯蘭為人秉性忠直趨捷有力甫冠補

禁軍咸雍初從招討使耶律卓克箕討蕃部之違命者及請降來介有能躍駝峯而上者以僥捷相說卓克箕問左右誰能此和克被重鎧而出手不及峰一躍而上使者大駭卓克箕以女妻之帝聞召為護衛時耶律伊遜以狡佞得幸肆行兇暴和克伏于橋下伺其過欲殺之俄以暴雨壞橋不果後又欲殺于獵所為親友所阻太康三年復欲殺伊遜及蕭德勒岱等伊遜知而械繫之考劾不服流於邊及太子廢徙於上京召和克至殺



之乾統初追贈龍虎衛上將軍



欽定續通志卷五百十六

欽定四庫全書

史部

欽定續通志卷五百十八

侍講學士<sub>臣</sub>羅國俊覆勘

總校官原任侍講臣王燕緒

欽定四庫全書

欽定續通志卷五百廿七

忠義傳

金一

華沙布 薩巴

特庫

布古德 蘇哈

鈕祜祿罕努

溫特赫布敦

圖克坦色哩持嘉和碩台鶴壽完顏珠勒呼完顏希卜蘇持嘉和色里爪

爾佳邁珠完顏蘇瑪喀高彭祖

曹珪

額哩頁

閔孫博多

史大

温特罕伊蘇瑪勒

富珠哩定方

瓜爾佳呼喇

納喇綽齊

魏全

布埒庫

瓜爾佳守中

舒穆魯元毅

伯特梅和尚

博克托

珊延

實古納

烏克遜温屯

高守約

哈薩喇安禮

王維翰

伊喇古尼

宋辰

烏庫哩榮祖

烏庫哩仲溫

玖珠

唐古布格蘇

李演

劉德基

王毅

王晦

牛斗

齊鷹揚

楊敏中  
張奇爾

珠嘉法心

溫特赫伊扎爾  
溫特赫十方努

富察吉遜

高錫

吳僧格

張順

馬驤

鄂屯醜和尚

烏庫哩德升

蘇爾坦郭用

李革

富珠哩福壽

馬慶祥胥謙 嗣亨  
布薩和碩

華沙布完顏部人年三十五從軍勇敢有材略頗見任  
用太祖使富卦喇往遼詣阿蘇實觀其形勢富卦喇還  
言遼兵多不知數太祖疑之使華沙布往還報遼方調  
兵尚未大集太祖喜曰果如吾言據本紀增華沙布因勸舉  
大事不可後時若俟河凍則盛集來攻矣太祖深然之  
從破寧江州戰于達魯噶城皆有功高永昌請和華沙

布往招之取呼圖克以歸永昌詐降幹魯使華沙布薩  
已往報會高禎降言永昌非真降者幹魯乃進兵永昌  
怒遂殺二人皆支解之華沙布就執神色自若罵永昌  
曰汝叛君逆天今日殺我明日及汝矣罵不絕口死天  
會中與薩巴俱贈遙鎮節度使

特庫音德爾水人敢戰鬪達嚕噶城之役和尼陷敵特  
庫救出之攻北蘇城先登敗遼兵三千攻魯庫營瑪奇  
墮馬特庫獨殺遼兵數輩掖出之後從太祖自臨潢班



師至遼河伊都來襲羅索已引去特庫獨殿馬僊步關  
沒於陣皇統間贈明威將軍

布古德宗室子初事國相薩哈伐蕭哈里有功與綽哈  
俱招降矩威水部族綽哈為穆昆布古德領行軍千戶  
從破黃龍府戰於達嚕噶城皆有功寧江州渤海伊色  
布叛布古德追復之天輔五年

按太祖紀綽哈籍軍馬  
在天輔四年斡魯伐錫

勒哈塔在天輔五年  
此作五年六年互異九月綽哈布古德往拜格河籍軍

馬矩威水部錫勒哈塔等殺之投其尸水中太祖悼惜

遣使弔賻加等六年正月幹魯伐錫勒哈塔於希爾哈  
河追及於哈達拉山殺四人撫定餘衆詔求二人尸以  
葬天眷中贈綽哈奉國上將軍布古德昭義大將軍綽  
哈亦宗室子年十五隸軍從太祖伐遼率屯路兵招撫  
薩木坦錫里肯巴噶三水拜格城邑皆降之敗室韋五  
百於阿爾噶城獲其民衆至是死焉

鈕祜祿罕努以護衛從宗弼征伐賜鎧甲弓矢戰馬初  
太祖入居庸闕遼林牙耶律達實自古北口亡去以其

衆來襲奉聖州羅索往取之獲達實并降其衆宗望襲  
遼主輜重於青塚以達實為鄉導既而亡去不知所往

皇統四年回紇遣使入貢言達實與其國相鄰詔遣罕

努與俱往奉使達實

案本紀皇統四年回鶻使來賀以  
鈕祜祿罕努報之六年遣鈕祜祿

罕努招耶律達實被害據此  
似非一事事與本傳小異

去後不復聞問大定中回

紇展盤君長薩里罕托色率喀喇部長貝歡及戶三萬  
餘求內附乞納前達實所降牌印受朝廷牌印詔西南  
招討司遣通事圖哩伊都及阿嚕岱至其國見薩里罕

得其歸順實意因言往年大國嘗遣鈕祜祿罕努自和  
州往使達實既入其境達實方適野與遇問何人敢不  
下馬罕努曰我上國使奉天子命來招汝降當下馬聽  
詔達實曰汝單使來欲事口舌邪使人猝下使跪罕努  
罵曰反賊天子不忍於爾加兵遣招爾縱不能面縛請  
罪闕下亦當盡敬天子使乃敢反加辱乎達實怒乃殺  
之此時達實林牙已死子孫相繼西方諸部仍以達實  
呼之伊都阿魯岱還奏世宗嘉其奉使萬里不辱君命

能盡臣節贈昭毅大將軍遷其子永和縣商酒都監尚  
和為尚輦局直長加武義將軍汝州巡檢羅索為武器  
署直長

溫特赫布敦為烏哲羣牧使西北路契丹薩巴等反諸  
羣牧皆應之布敦聞亂選家奴材勇者給以兵仗陰為  
備賊不得發乃佯為降伏給諸奴曰官閱兵器願借以  
應閱諸奴以為實然遂借與之明旦賊至無以禦賊執  
布敦問曰今欲反未布敦曰吾家世受國厚恩子姪皆

仕宦不能從汝反也賊怒鸞殺之子孫皆與害時達斡  
羣牧使圖克坦色哩副使持嘉和碩台伊囉斡羣牧使  
鶴壽額勒本羣牧使完顏珠勒呼副使完顏希卜蘇布  
塔布部副使持嘉和色里蘇穆坦紉詳袞瓜爾佳邁珠  
呼敦紉詳袞完顏蘇瑪喀實默詳袞高彭祖等皆遇害  
鶴壽鄆王昂子本名烏達布五院部人和尚率衆來  
招鶴壽與俱反鶴壽曰吾宗室子受國厚恩寧殺我不  
能與賊俱反遂與二子皆被殺

曹珪徐州人大定四年州人江志作亂珪子弼在賊黨中珪謀誅志并弼殺之尚書省議當補二官雜班叙詔曰珪赤心為國大義滅親法雖如是然未足以當其功更進一官正班用之

額哩頁契丹人為尚廩局直長大定初招諭契丹斡罕叱令跪見不從謂曰我朝廷使豈可屈節於汝汝等早降可全性命若大軍至悔將何及斡罕怒曰汝本契丹人而不我從敢出是言遂害之從行驍騎軍士閔孫史

大習馬實達爾博多皆被害三年贈額哩頁宣武將軍  
錄其子阿卜薩為外帳實達爾閏孫史大皆贈修武校  
尉博多忠翊校尉

溫特赫伊蘇瑪勒率賓屯茂赫辰人徙上京和倫舍哩  
兄卓諾國初有功授世襲穆昆伊蘇瑪勒性忠毅善騎  
射膂力過人皇統初襲其兄穆昆積戰功為洮州刺史  
兄子烏楞古已長遂以穆昆讓還兄子宗弼聞而嘉之  
除貴德州刺史改伊勒敦紉詳袞遷烏庫哩部族節度



使改德昌軍正隆間南伐泰州明安定遠阿巴以所部  
叛還伊蘇瑪勒以七穆昆執之勒其衆付大軍契丹反  
伊蘇瑪勒率數千人殺賊萬餘于雅哈河以功遷臨潢  
尹世宗即位仍舊職時幹罕以兵數萬攻臨潢諸路軍  
未至伊蘇瑪勒領城中軍士六百人邀擊之勦殺甚衆  
所乘馬中流矢而仆為賊所執賊使招城中出降怒罵  
曰我受國家爵祿肯從汝叛賊乎賊脅之至城下其妻  
子官屬將士皆登城臨望伊蘇瑪勒厲聲曰我恨軍少

不能滅賊人生會有一聲耳若開門納賊城中百姓將被殺掠慎勿以我故降賊賊無能為也賊怒殺之城中

人皆為感激推官麻珪益繕完城郭右都監

按金史世宗紀及實

圖美本傳俱作右都監此訛作右監軍今據改

實圖美輔國上將軍阿索美乘

城固守賊不克攻遂引衆東行

按伊蘇瑪勒不屈于賊完節以死可謂忠於所

事今由列傳移入忠義

富珠哩定方本名阿哈寧嘉河人材勇絕倫天德初召授武義將軍充護衛遷宿直將軍尋為殿前右衛將軍

累擢殿前左右副點檢世襲明安出為河南尹改彰德軍節度使海陵南伐定方為神勇軍都總管大定二年宋人陷汝州河南統軍使宗尹遣定方將兵四千往取之汝州東南北三面皆阻山林不可以騎軍戰時宋兵由鷓路出沒定方至襄城得敵虛實遂牒諭汝州屬縣曰我率許州戍兵十二萬徑取汝州爾等可備糧草二十萬使人揚言欲據要路絕宋兵往來既而定方引兵趨鷓路宋人聞之果棄城遁去定方至魯山境知宋兵

已去遣輕騎二百追至布袴义擊敗之遂復汝州授鳳翔尹宋李世輔陷宿州定方從左副元帥志寧戰于城下時天大暑定方督戰馳突敵陣中出入數四渴甚因出陣下馬取水為人所害帝聞而閔之詔有司致祭賻贈加禮贈金紫光祿大夫

按定方及呼喇皆沒於戰陳今並由列傳移入忠義

瓜爾佳呼喇上京桑阿屯明安人初在左副元帥達蘭帳下有戰功授武德將軍襲其父穆昆正隆末山東盜起呼喇為行軍明安敗賊千五百人於徐州南山東路

統軍司選諸軍八百人作十穆昆呼喇將之與驍騎軍  
皆隸點檢司行至淮南海陵遣以騎兵三百二十往揚  
州敗宋兵千五百人於宣化鎮布薩忠義伐宋呼喇領  
萬戶由泗州進戰遇敵於宿州歿于陣贈鎮國上將軍  
納喇綽齊咸平路雅哈河明安人契丹瓜里使人招之  
不從兵且至綽齊遂團結旁近村寨為兵出家馬百餘  
匹給之教以戰陣擊刺之法拒瓜里于改渡口賊衆月  
餘不得進既而兵大至拒戰不敵遂見執鬻殺之詔贈

官兩階二子皆得廢

魏全壽州人泰和六年宋李爽

原訛李爽今據本紀改

圍壽州刺

史圖克坦義盡籍城中兵民及部曲廝役得三千餘人  
隨機拒守義善撫御得衆情婦人皆樂為用同知布埒  
庫中流矢卒義益勵不衰募人往斫爽營全在選中為  
所執爽謂全曰若為我罵金主免若死全至城下反罵  
宋主爽乃殺之布薩揆遣河南統軍判官奇珠及邁格  
等以騎二千人救壽州與爽兵遇奇珠分兩翼夾擊大

破之至城下義出兵應之爽兵復大潰爽僅脫去詔遷  
義防禦使奇珠同知昌武軍節度使邁格河南路統軍  
判官贈布埒庫昭勇大將軍官其子圖喇贈宣武昌將  
軍蒙城縣令賜在州官舍俟其子年十五歲收充八貫  
石正班局以全死節由錄送史館鏤板頒諭天下

瓜爾佳守中咸平人本名阿多古大定二十二年進士  
累官同知海蘭路兵馬都總管府事坐事謫尋復同知  
平涼府事大安二年遷通遠軍節度使至寧末移彰德

軍未行夏兵數萬入鞏州守中乘城備守兵少不能支  
城陷官吏盡降守中獨不屈夏人壯之誘脅至平涼要  
以招降府人守中佯許至城下即大呼曰外兵矢盡且  
遁矣慎勿降夏人交刃殺之興定元年監察御史郭著  
以聞詔贈資善大夫東京留守仍收其子鄂摩為筆硯  
承奉

舒穆魯元毅本名舒蘇咸平府路珠徹埒明安沙璉噶  
珊穆昆人為寧津令有劇盜白晝恣劫元毅以術防捍



賊散去入為大理知法除同知亳州防禦事省檄使錄  
右五路刑獄無寃人復委受宋歲幣卻故事私遺物明  
昌初驛召為大名等路提刑判官以最遷汾陽軍節度  
副使命捕石嵐間賊黨賊畏遁追襲盡殪之二境以安  
遷同知武勝軍節度使事別郡有殺人者訊不數語即  
具服河東北路田多山坡磽瘠舊定為上賦民力久困  
朝廷命相地更賦元毅以三壤法平之民賴其利尋以  
邊警授撫州刺史會邊將失守芻糧馬牛焚剽殆盡元

毅率吏卒三十餘人出州經畫軍餉卒遇敵倅吏堅請  
還元毅曰我輩責任邊守遇敵而奔其如百姓何遂執  
弓矢先驅力戰衆爭效死敵去而復合元毅氣愈厲鏖  
戰久之衆寡不敵遂遇害事聞贈信武將軍召用其子  
世勛侍儀司承應後登進士第

伯特梅和尚泰州人性鯁直尚氣節正隆間收充護衛  
累官武勝軍節度使明昌六年左丞相瓜爾佳清臣行  
省臨潢檄為副統會敵入偕護衛博克托等領軍逆擊

直擣其陣殺傷甚衆敵知孤陣無繼聚兵圍之度不能免乃下馬相背射復殺百餘人矢盡猶以弓提擊為流矢所中死博克托等皆沒帝聞之震悼詔贈龍虎衛上將軍以其子都努為軍前明安承安五年帝諭梅和尚死王事其子都努從軍久有功乃命為典署丞

珊廷宗室子為符寶祗候完顏實古納為護衛十人長至寧元年八月赫舍哩執中作亂入自通玄門變起倉猝中外不知所為珊廷實古納往天王寺召大漢軍五

百人赴難與執中戰東華門外不勝死殺五百人殆盡  
執中死詔贈實古納鎮國上將軍順州刺史珊延宣武  
將軍順天軍節度副使嘗從拒戰明安穆昆佛寧散軍  
遷賞有差實古納子給八貫石俸俟年十五以聞

烏克遜温屯上京路人大定末襲明安累官唐州刺史  
泰和六年四月宋皇甫斌步騎萬人侵唐州温屯兵甚  
少遣泌陽尉博碩布巡檢蒲閑各以五十人乘城拒守  
温屯見宋兵在城東北者可破令判官薩克達以精兵

百人繞出宋兵營後掩擊之宋兵大亂夜遁去五月皇甫斌復以兵數萬來攻行省遣泌陽副巡檢納哈塔軍勝救唐州溫屯出兵與軍勝合設伏以待分騎兵為三一出一入以致宋兵陷于淖伏發中衝為二遂大潰宋別將以兵三千來襲殪之竹林寺納哈塔軍勝手殺宋將取其金帶印章以獻詔遷溫屯河南府同知軍勝梁縣令右副元帥完顏匡取棗陽溫屯為右翼都統襲神馬坡宋兵五萬人夾水陣以強弩拒岸溫屯分兵奪其

三橋自辰至午連拔十三柵遂取神馬坡從攻襄至漢  
江溫屯亂流徑度宋人請和遷河南副統軍大安三年  
將兵二萬入衛中都遷元帥左都監兼北京留守有功  
遷元帥左監軍貞祐元年閏九月以兵入衛中都詔以  
兵萬六千人守定興軍敗戰沒

高守約字從簡遼陽人大定二十八年進士累官觀州  
刺史貞祐元年冬十一月元兵徇地河朔郭邦獻歸順  
從至城下再三呼曰從簡當計全家室守約厲聲曰吾

不汝識也城破被執使之跪不屈遂死詔贈崇義軍節度使謚忠敬

哈薩喇安禮字子敬本名酌大名路人  
大定二十八年進士為泰安州刺史貞祐初山東被兵郡縣望風遁或勸安禮去安禮曰我去城誰與守忍避難負國恩乎乃團練繕完為禦守計已而元兵至戰旬日不能下謂之曰此孤城耳內無糧儲外無兵援不降無遺類矣安禮不聽城破被執初不識為誰或妄以酒監對安禮曰我

刺史也何諱為使之跪不屈以戈撞其脅殺之詔贈秦  
定軍節度使謚堅貞

王維翰字之翰利州龍山人大定二十八年進士為永  
霸令縣豪欲嘗試維翰設事陳訴窮伏其詐杖殺之健  
訟衰息佐胥持國治河決有勞累遷保靜軍節度同知  
檢括戶籍一郡稱平屬縣有奴殺主反誣其弟維翰微  
行得其狀奴遂引服歷侍御史改右司郎中從布薩揆  
伐宋宋人受盟帝問宋人請和復能背盟否對曰宋不



足憂唯北方當勞聖慮耳大安初遷工刑二部尚書拜  
參知政事貞祐初罷為定海軍節度使至鎮無兵備鄰  
郡皆望風奔潰乃縱百姓避難率吏民願從者奔東北  
山結營堡自守力窮被執與妻姚氏皆不屈死贈中奉  
大夫妻為國夫人謚貞潔

伊喇古尼安化軍節度使貞祐初元兵取密州古尼率  
兵力戰流矢連中其頸拔去復中頰死焉三年贈安遠  
大將軍知益都府事

宋辰中都宛平人正隆五年進士累官武定軍節度副使中都右警巡使固安縣丞劉昭與部民裴原爭買鄰田辰用昭屬抑原使毋爭御史臺劾奏解職降廣寧府推官累遷北京臨潢等路按察使改河東南路轉運使御史劾其前任按察侵民舍不稱職降沂州防禦使復遷定海軍節度使貞祐二年改沁南軍元兵至懷州城破死焉

烏庫哩榮祖本名福興河間人明昌二年進士累官戶

部員外郎寧海州刺史貞祐二年城破力戰死之贈安武軍節度使賜諡毅勇

烏庫哩仲溫本名呼喇蓋州安春明安人大定二十五年進士累官鎮西軍節度使時中都被圍移書安撫使賈益謙約以鄉兵赴救同會於絳抵平陽不能進仲溫嘗治平陽吏民爭留之仲溫曰平陽巨鎮易為守禦于私計得矣如嵐州何遂還鎮已而元兵大至城破不屈死贈資德大夫博索路兵馬都總管諡忠毅

玖珠宗室子為武州刺史唐古布格蘇為軍事判官貞祐二年十一月元兵取玖珠子姪抵城下謂曰山東河北皆降汝家屬我亦得不速降且殺之玖珠曰當以死報國遑恤家為無何城破力戰死布格蘇亦不屈死贈玖珠臨海軍節度使加驃騎衛上將軍布格蘇建州刺史加鎮國上將軍

李演字巨川任城人泰和六年進士第一除應奉翰林文字丁憂居鄉里貞祐初任城被兵演墨衰為濟州刺

史畫守禦策召集州人為兵搏戰三日衆皆市人不能戰逃散演被執元將問曰汝非李應奉乎答曰是也使之跪不屈許以官祿演曰我書生也本朝何負於我而利人之官祿哉元將怒曳出殺之贈濟州刺史

劉德基大興人貞祐元年特賜同進士出身守官邊邑夏兵攻城德基坐廳事積薪其旁謂家人曰城破即焚我及城破家人不忍縱火遂被執脅使跪降德基不屈同僚故人給夏人曰此人素病狂德基曰為臣子當如

此吾豈狂邪夏人壯其義繫諸獄已而召問德基大罵  
終不能從曰吾豈苟生者哉遂害之贈朝列大夫同知  
通遠軍節度使事

王毅大興人經義進士累官東明令貞祐二年東明圍  
急毅率民兵拒守城破猶率衆抗戰力窮被執與縣人  
王八等四人同驅之郭外先殺二人王八即前跪將降  
毅以足踏之厲聲曰忠臣不佐二主汝乃降乎驅毅者  
以刃斫其脛不屈死贈曹州刺史

王晦字子明澤州高平人少負氣自意慕張詠之為人  
友妻與人有私晦手刃殺之中明昌二年進士調長葛  
主簿有能聲累遷戶部郎中貞祐初中都戒嚴或舉晦  
有將帥才俾募人自將得死士萬餘統之衛送通州粟  
入中都有功尋守順州通州圍急晦攻牛欄山以解遷  
翰林侍讀學士九月順州受兵晦有別部在滄景遣人  
突圍召之衆皆踴躍思奮而主者不肯發故部曲王臻  
免胄出見且拜曰事急矣自苦何為晦曰朝廷何負汝

邪臻曰臻雖負國不忍負公因泣下晦叱曰吾年六十致位三品死則吾分詎從汝邪將射之臻掩泣去無何將士縋城出降晦被執不屈死愛將牛斗亦死贈榮祿大夫樞密副使錄其子汝霖為筆硯承奉

齊鷹揚淄州軍事判官楊敏中屯留縣尉致仕張竒爾淄州民貞祐初元兵取淄州鷹揚等募兵備禦城破率衆巷戰創甚被執欲降之鷹揚伺守者稍怠即起奪槊殺數人死敏中竒爾皆不屈死贈鷹揚嘉議大夫淄州



刺史敏中昭勇大將軍同知橫海軍節度使事奇爾宣  
武將軍同知淄州軍州事

珠嘉法心薊州明安人官至北京副留守貞祐二年為  
提控與順州軍事同知溫特赫伊扎爾俱守密雲縣家  
屬留薊州元兵得之以示法心曰若速降當以付汝否  
則殺之法心曰吾事本朝受厚恩豈以家人死生為計  
邪城破死於陣伊扎爾被執亦不屈死盤安軍節度判  
官富察吉遜與雞澤縣令溫特赫十方努同守薊州衆

潰而出二人死之詔贈法心開府儀同三司樞密副使  
封宿國公伊扎爾鎮國上將軍順州刺史吉遜金紫光  
祿大夫薊州刺史十方努鎮國上將軍薊州刺史

高錫字永之德基子以廕補官積勞調淄州酒使課最  
遷萍鄉令察廉遷遼東路轉運度支判官貞祐初累官  
河北東路按察轉運使城破自投城下死

吳僧格西南路唐古伊喇札珊舍音部落人拳勇善騎  
射貞祐初為萬戶朔州失守僧格復取之授同知順義

軍節度使事弟達喇副使燕綽爾判官衆苦乏食僧格乞賜糧十五萬斛朝議以應州已破朔孤城勢不可守遷軍民九萬餘口分屯嵐石隰吉絳解之間未行元兵至戰七晝夜有功遙受同知太原府事達喇石州刺史綽爾同知岢嵐州防禦使事四年始遷其民且戰且行力憊馬躓死詔贈鎮國上將軍順義軍節度使

張順溜州士伍溜州被圍行省侯摯遣王廷玉將兵救之募順等三十人往覘兵勢且欲令城中知援兵至順

乘夜至城下為敵所執使宣言行省軍敗績廷玉亦死  
宜速降順陽許諾既乃呼謂城中曰外兵無多王提控  
軍且至堅守毋降兵刃交下順曰得為忠孝鬼足矣遂  
死淄人以死守城賴以完後贈宣武將軍同知棗州防  
禦使事詔有司給養其親且訪其子孫優加任用

馬驤禹城人登進士歷官有聲貞祐三年為曹州濟陰  
令元兵克曹州驤被執軍卒榜掠求金曰吾書生何從  
得又使跪曰吾膝不能屈欲殺即殺得死為大金鬼足

矣遂死贈朝列大夫秦定軍節度副使子維賢收補八貫石局分

鄂屯醜和尚為代州經略使貞祐四年八月元兵攻代州禦戰敗績身被數創被執欲降之不屈死

烏庫哩德升本名祿錦益都路明安人明昌二年進士累官侍御史論赫舍哩執中姦惡衛紹王不聽遷肇州防禦使宣宗遷汴召赴闕進翰林侍讀學士權參知政事與平章穆延盡忠論近侍局預政帝怒出為集慶軍

節度使改知太原府事興定元年元兵急攻太原糧道絕德升屢出兵戰糧道復通上言皇太子聰明仁孝保訓之官已備更宜選德望素著之士朝夕左右此社稷之洪休生民之大慶也帝嘉納之二年授左監軍元兵復圍太原環之數匝已破濠垣植柵為拒出其家幣馬賞戰士元軍環城西北隅以入復聯車塞之三却三登矢石如雨守陴者不能立城破德升至府署謂其姑及妻曰吾守此數年不幸力窮乃自縊死姑及妻皆自殺

詔贈翰林學士承旨子烏蘭威尚幼以奉御俸養之  
蘇爾坦宗室子貞祐二年充宣差都提控安撫山西軍  
民應援中都上書言九事一絳解二州僅能城守連歲  
不登人多艱食皆恃鹽布易米願罷大陽等渡禁許粟  
麥過河官稅十三則公私皆濟二絳解河中必爭之地  
令寶昌軍節度使從宜規畫鹽布之利以實之則民受  
其利兵可以強三中條之南垣曲平陸芮城虞鄉乃河  
東形勢陝洛襟喉可分陝州步騎萬二千人為一提控

四都統分戍四縣四平陸產銀鐵若以鹽易米募工鍊  
冶可以廣財用備戎器小民傭食可以息盜五河北貧  
民渡河逐食復還當抑止暴吏誅求之弊六河南陝西  
調度未急則騎軍牝馬羣牧不二三年可增數萬騎軍  
勢自振七諸路印造寶券久而益多必將積滯止于南  
京印造給降庶可久行八河北職任雖除授不次人皆  
不願益以物價十倍河南祿稟不給饑寒且至若給實  
俸之半少足養廉則可責其効力九河北之官朝廷減



資遷秩躡等以答其勞聞河南官吏以賤逐目之乞行  
禁止書奏下尚書省議略行之四年行樞密院於河南  
府上書用兵累年出輒無功者兵不素勵也士庶且充  
行伍況于皇族與國同休戚皆當從軍親冒矢石為士  
卒先族人道格實同此心願隸臣麾下帝嘉其忠許之  
興定元年改輝州刺史時諸路兵皆入城自守百姓耕  
稼失所蘇爾坦言養兵所以衛民方今河朔惟真定河  
間之衆可留扞城其餘府州皆當散屯于外以為民防

俟稼穡畢功然後移于屯守之地從之加遙授同知東平府事權元帥左監軍與參政李革俱守平陽元兵破太原河東郡縣皆不守上言平陽河東之根本河南之藩籬也今行省兵不滿六千乞併懷孟衛州之兵以實潞州調澤州沁水端氏高平諸兵並山為營以為聲援未報元兵至平陽提控郭用戰于城北濠垣被執不屈死城破蘇爾坦自殺贈昌武軍節度使

李革字君美河津人大定二十五年進士調真定主簿

察廉遷韓城令同知州事納富商賂以歲課軍須配屬  
縣革獨不聽提刑司以為能累遷太原推官除大興縣  
令歷同知昭義軍節度使改簽南京按察事泰和六年  
革與簽陝西高霖簽山東孟子元俱被詔體訪三路官  
員能否赴闕奏事改刑部員外郎歷大興府治中知府  
圖克坦南平貴倖用事勢傾中外遺所親以進取誘革  
革拒之貞祐三年遷戶部侍郎宣宗遷汴行河北西路  
六部事累遷戶部吏部尚書陝西行省參議官四年拜

叅知政事革奏請凡斷例敕條特旨奏斷不為永格者不許引用皆以律為正詔從之是歲元兵破潼關革自以執政失備禦之策上表請罷不許尋為絳陽軍節度使興定元年胥昺自平陽移鎮陝西革代昺為河東行省兼知平陽府是時興兵伐宋革上書曰今之計當休兵息民養銳待敵宋雖造釁止可自備若不忍小忿以勤遠略恐或乘之不能支也不納太原兵闕食革移粟七萬石以濟之二年宣差鈕祜祿蘇卜至河東牒行省

清野時晚禾未孰革奏今歲雨澤及時秋成可待如今  
耕毀民將不堪詔從之十月平陽被圍城中軍不滿六  
千屢出戰旬日間傷者過半徵兵吉隰霍三州不時至  
裨將李懷德絕城出降兵自城東南入左右請革上馬  
突圍出革歎曰吾不能保此城何面目見天子汝輩可  
去矣乃自殺贈尚書右丞

按李革以孤城抗敵救援不  
至完節而死今由列傳移入

忠義

富珠哩福壽為唐邑主簿元兵攻唐邑福壽與戰死之

贈官三階

馬慶祥字瑞寧本名蘇爾濟蘇先世自西域入居臨洮  
狄道以馬為氏後徙淨州天山泰和中試補譯史慶祥  
通六國語大安初衛王選為副使通問於元還授開封  
府判官未幾元兵出陝右命副完顏仲元為鳳翔府路  
兵馬判官元光元年冬十一月元將蒙古布哈將攻鳳  
翔行省檄慶祥與治中胥謙分道清野遇先鋒于澮水  
且行且戰將及城元兵邀歸路不能脫令其騎曰吾屬

荷國厚恩竭力効死乃其職皆應曰諾人殊死戰良久  
矢盡與謙及其子嗣亨皆不屈死事聞與謙俱贈輔國  
上將軍慶祥恒州刺史謚忠愍謙彰化軍節度使嗣亨  
威遠將軍鳳翔府判官楨州金勝堡提控布薩和碩亦  
死贈銀青榮祿大夫正大二年立褒忠廟與王清田榮  
李貴王斌馮萬努張德威高行中程濟姬玘張山等十  
有三人皆從祀仍錄其孤

欽定續通志卷五百十七